

新刊權載之文集

權載之文集卷第十六

唐權德輿字載之

碑銘

唐故楚州淮陰縣令贈尚書右僕射王府君神

道碑銘

并序

天球白珩產於崇山叩之而清越格人莊士生於積德  
用之而宏其或含光不耀藏器不發乃熾而昌是滋  
百祥蘊而爲義方飾而爲徽章故太原王公四萃仕而  
領通邑五追崇而登端右循政茂於官下湛恩集於身  
後有繇然也公諱光謙字某自東漢鴈門太守澤五代

至晉中書令獻公坦之威蕤德名與吉祥侔盛自後魏  
龍驤將軍長社穆侯慧龍五代至隨祕書少監邵以勲  
華文學復大其門祕書生隨揚州戶曹參軍東戶曹生  
皇青州司戶參軍子奇司戶生美原丞贈太常卿慶賢  
三代沉晦邁其風訓公卽太常府君之長子也幼而岐  
嶷長而淳懿絜矩慎獨抱仁戴義閎深博辯之學稽古  
禮文之事炳然含章靡不通貫至若文舒之清修廉實  
處冲之剖析元微安期之宏恕懷祖之沈靜合是家法  
而躬行之始以門廕受署凡四徙官曰幽州三水潞城  
二主簿絳州萬泉縣丞楚州淮陰縣令所至之邦二千

石必加禮慰薦而公牢讓勇退卑不可踰又爲縣令也  
務清靜之理而去其煩苦推明誠之本而教以廉愧一  
同熙熙生殖阜滋楚風丕變幾至齊魯因喟然曰彼天  
爵美祿者在仁義與樽酒而已太邱彭澤豈多秩耶於  
是放懷於外嗇神於內沉研象繫之表磅礴天人之際  
其致知格物不可詳已以開元二十九年春正月捐館  
舍於淮陰年六十九其明年返葬於河南府偃師縣北  
山之陽夫人博陵崔氏贈博陵郡太夫人繼夫人隴西  
李氏後夫人同郡武氏贈彭城郡太夫人飾終三加子  
貴故也公之才子五人長曰翊以文雅典憲直方貞厲

歷御史中丞左散騎常侍刑部吏部二侍郎御史大夫  
贈戶部尚書諡曰忠惠次曰翱吏理詳明官河南府陽  
翟縣丞次曰翊循良愷悌勲德茂盛歷辰朗客三州刺  
史容管經畧使兼御史中丞河中少尹朔方節度留後  
汾州刺史單于副都護振武軍使徵拜京兆尹尋兼御  
史大夫再居大理卿爲福建州觀察使入爲太子賓客  
貞元十二年檢校禮部尚書東都留守踐履藩垣逾四  
十年階至特進爵封本郡次曰向士行清修爲秦州上  
邽縣尉幼曰颺文敏幹俗歷監察御史三原縣令著作  
郎太子僕翱向皆不幸早夭颺亦命屈其志而忠惠公

太原公摠集休祉爲宗公蓋臣初忠惠公與肅宗代宗  
從容言天下事甚衆且曰文致太平在正名百職危言  
惴惴痛詆權倖條疏理道坦然章明沃心前席倚以爲  
相者數矣雖位竟不至而其遺風直聲暴乎天下太原  
公剖符賦政累刻金石滅夷越劇賊開地靖人倖蒲也  
以沉機銷急變護單于也以尺書柔獷俗中外官師淑  
聲流聞保釐尹正式是東夏安危注意未始有極言代  
德者以公之道未光而慶下鍾惟其有之是以似之之  
故也初以忠惠公扈鑾輅於岷峨其勤匪懈贈公隴州  
刺史又以持節印冊命專對於北方間關忠力再贈公

秘書監後以太原公南服嘉庸三贈公爲兵部尙書以  
轂下肅清四贈公爲太子少保以閩方報政五贈公爲  
尙書右僕射噫嘻賢人教忠之業令嗣揚名之孝大君  
追遠之澤是三者可謂至矣十七年太原公貞于龜筮  
得二月壬寅吉於是備八旒七章驚冕佩玉之飾博陵  
彭城二郡太夫人以象服耐焉詔給鹵簿官司喪事慶  
靈集於一門光耀被於九原君子然後知積德豐報之  
不誣矣至若忠惠之子爲守臣太原之壻居台司諸孫  
昌阜冠聯圭組則列諸碑陰以備代家斷此琬琰銘公  
德善其詞曰

有斐君子兮德行醇備蟬聯亘赫兮峻閭宏義觀我靈  
龜兮懼腊毒之厚味樹風百里兮馳蒲密之極摯慈和  
安靜兮闔境如春仲曼容兮與古爲倫全才不耀兮流  
慶後昆忠惠旣沒兮太原顯尊五加追合兮賁此元壤  
隼旗龍劒兮以至師長澤流根兮恩漏泉壽堂拱木兮  
橫蒼烟隨武可作兮臧孫有後崇崗樂石兮昭晰悠久  
吁嗟王公斯不朽

唐故鄜州伏陸縣令贈左散騎常侍王府君神

道碑銘

并序

國家以孝理天下褒有功之臣寄崇元侯及先子印綬



名器貴於冥冥繇是王公三受追命有金貂附蟬之飾  
公諱崇術字敬方其先太原晉陽人晉司徒渾之後也  
中以閹閹徙於帝邱今以名數籍于轂下曾王父皇集  
州司倉參軍元素元素生朝散大夫滑州渭南縣令瓌  
生蔚州司法參軍宏効皆用儒行自守故纓轂未華仕  
不過郡掾史縣大夫而休問四暢公卽司倉府君之子  
方嚴密靜忠厚溫克覽六籍三畧如古人之心開元中  
舉孝廉仍歲爲有司所絀因罷卷慨息慕班超傳介子  
之爲人遂從河西節度杜尙書運撫劍相合一命昭武  
校尉蘭州金城縣別將再命鄜州修武府左果毅都尉

伐謀決勝多以咨之居戲下數歲因喟然曰務功伐而違敬養豈吾之心耶陟岷倚門慈戀交感及嘉仲由而罪吳起去危事以承歡顏旣至郡按察使表其義風可移於教化有詔試守鄜州伏陸令爲之三年禮俗休和入爲怡聲出有循政熙熙然千室以仁遂焉雖宐不齊之理單父庚桑楚之居岷嶠不是過也察廉薦延者方因公以俟上賞俄丁太夫人憂喪期斬焉闋而猶毀又喟然曰嚮所以不擇祿者備膳羞耳今則求志豈靳畜於樊中耶於是善閑以葆其身教忠以大其門語仁義於燕間集寵嘉於後昆以天寶八年春正月考終命于

濮州濮陽縣享年七十二嘉耦北平田氏夏州司馬藝之息女淑慎柔正宜于家室後七歲没于徐州有子三人長曰奇哲倣儻沉勇與河內尙衡扶義于河南積功榮至恒州刺史蹈難以没不害於仁次曰棲榮亦以忠力策謀至左威衛將軍幼曰棲曜寬明博大有文武畧左右征師炳著成功掃蠱毒於姑胥靜鴟誼於夷門興元元年以太子詹事加御史大夫繇太原縣侯進封瑯琊郡王貞元三年從晉國韓公來朝京師拜輔國大將軍左龍武軍將軍明年又以御史大夫爲鄜坊丹延等州節度觀察等使十二年就加禮部尙書納忠服勞考

禮修職克稟風訓爲時翰垣旋觀賦政之府乃公筮作  
之地威霜露於休惕展蒸嘗於吉蠲蓋貽慶考祥必有  
所自不然何回復宏大於是邦耶初大厯十年朝廷以  
尚書偏師策勲贈公開州刺史貞元九年又以撫劍宣  
力贈公宋州刺史是歲天子以一純二精大饗報本其  
明年贈公左散騎常侍夫人始贈北平郡太君再封北  
平郡太夫人至是三加爲燕國夫人十年十月追錫之  
車服器用改葬之祔輔合祔濮陽縣洛城鄉全義里之  
西原先是尚書旣得吉卜如始居喪之戚累章請乞親  
壤樹上以戎閭委重俾其子正元往襄事焉噫嘻追養

繼志有哀有敬義方啟迪之遠纂服裕盛之盛蕃衍昌  
阜叢於子姓宜哉斲石舊封以摠德善其銘曰

仕不必貴難乎求備抑抑王公修仁踐義式昭再命宏  
厥武事美化一同炳然文理燕居就養消息恬智從心  
之年亦已過二沒代流慶密章下賁此追劇藩乃進常  
侍婉彼燕國柔嘉樂易光叶闔門克昌後嗣蟬冠象服  
同穴茲地金石繫辭式昭遺懿

唐故通議大夫守戶部尚書兼御史大夫持節  
充朔方鎮西北庭興平陳鄭等州行營兵馬  
及河中節度都統處置等使兼管內觀察使

權知絳州刺史賜紫金魚袋贈揚州大都督

府李公神道碑銘

并序

周道親親夾輔王室分唐叔以懷姓九宗職官五正故  
其後又侯受和豐之命文公受大輅之錫祿勲推恩敦  
叙昌大理道之所繇也國家憲章文武選逮明德元功  
侯籍延耀本枝初太祖景皇帝之支曰鄭王亮實生淮  
安王神通用親賢功德左右休運淄川郡王孝同淮安  
之昭也右衛將軍燧淄川之穆也劍州長史贈太僕少  
卿廣業承祖禍積厚之慶而生尙書尹三王都惣六師  
帥八命四履投難服勞有猷有守以至歿代禮賁於追

命澤流於代官有由然也尙書諱國貞字南華天姿風采爲宗室儀矩列如寒泉巖若崇山修身筮仕動有休裕開元十三年明皇帝肆覲東后柴于岱宗以公族侍祠調補綿州參軍事暴雨忽至江流美溢公自下位能禦其災旣堅舊防乃復故道累遷岐州錄事參軍太師苗公太尉房公繼爲二千石皆所引重御史大夫張倚採訪關中表爲支使天寶末林胡覆三川犯秦關詔除殿中侍御史爲襄陽郡司馬且介戎政公以侍板輿辭革車換房陵太守表課尤異徵拜長安縣令風政肅清改秦州刺史命或中止復爲長安令尋遷汴州刺史未

及行復輟爲京兆少尹天子以公積有試効可居大官  
累命爲河南京兆成都尹劍南西川節度使其撫周郊  
狹獠方熾公與太尉臨淮王議曰河洛爲天下衝且無  
車賦比屋安堵寇將甘心焉不若虛其邑居挈以駿邁  
贏糧善地可俟師期繇是太尉壁河陽公次于陝伐謀  
消患君子推其智其在京轂兵火之餘人命將沈一作沈  
物力亦屈而百役煩苦出於傷痍公曰元元愁歎受命  
思養儻不能曠然丕變豈副明天子鬱悼之心耶列上  
蠲除悉蒙可報凡調於人者去其十九清淨愷弟百姓  
稱其仁鎮岷峨裔人樂禍殺嘉榮二州刺史以開邊隙



公命將疾攻舉無遺類明年昆戎圖我三城遣銳師據  
便城壁戒嚴持重徼其極而擊之賈餘無前酣戰盡殪  
悉獻虜獲軍無私焉隣壤不靖偏師叛換將盜兵符已  
據城寺出車壓境指顧而平凡三整武經而巴蜀軌道  
拊循安重四封畏其威柄用者沮公勲猷徵爲殿中監  
命書旣下不俟駕行囊被單車無道里費取倍稱之息  
五萬甫達京師上嘉而賜之俾折其券寇有段子章者  
恣睢就戮方帥以吉語問詔公宴見前席獎與曰利兵  
積穀皆卿之素也其無駭庠父之謂乎朝野嘉其首公  
而服其絜已臨淮王移鎮海岱長轂在郊西邊北朔合

淮陽圻父五諸侯之旅主盟中權盡護諸將於是拜戶部尙書河中節度都統使又以職顯戎重則風俗不阜加管內觀察使權知絳州刺史公外摠方畧內修班制當強弩之末無半菽之糧不忍加賦飛章未下猶以憲度爲已任推剽者斃不行師諸校譁張觶望至是夜暮變起或以跳驅諭公公曰吾之不敏當死節官下安敢貳偷以煩刑史亂之剡也公竟及焉議者尙其繫矩而哀其不淑時上元三年建卯月春秋四十八是歲改元寶應至夏五月寧神于三原縣之北原詔以揚州大都督印綬告第憫其勞也公本諱若幽上元中天子以特

立之操爲宗公表率錫嘉名以更焉公忠儉誠厚方嚴  
密靜用儒行憲令修明事功大玉不劇楚金必割凡歷  
官二十四自解巾至握節勤職十七其以內庭持書中  
執法亞丞相佩兩印以雄外服者又七命焉刺房陵之  
後五六年間車不輟鞅賦職任功名聲章明及公以司  
徒總輿師令弟若水以內府司贊謁而太夫人福履所  
介也陳壽觴懷黃佩玉左右溫清極魯侯之燕喜邁張  
仲之孝友宜錫壽寵爲人倫龜龍曾未中身遭罹凶害  
前史稱霍去病亦有天幸然則命之所賦有幸焉有不  
幸焉斯不可問已夫人扶風郡君竇氏鴻臚丞光之女

揚府長史御史大夫餽之姊也淑明仁順克叶公志家  
肥族睦抑有助焉公薨若干年而夫人歿子四人長曰  
錡材氣碩茂潔廉貞肅遵修訓則復大其門入作卿士  
出爲侯伯貞元十五年以御史中丞剖符潤州宣風以  
宏禮俗成賦以殖財用大績茂焉中邦賴焉明年就加  
御史大夫十八年進禮部尙書撫封題劔如公渥命次  
曰鎡蘄州刺史次曰豐士鄆縣令幼曰豐器長安縣尉  
皆有幹裕而屈於年位今尙書永惟先公丕矩未刻金  
石以德輿嘗叨史職久掌贊書知王族大僚之事業見  
託論譔故不敢默其美亦不敢溢其言銘曰

堯瞳九族漢封同姓烈烈淮安乘時佐命淄川而下三  
葉儲慶乃生我公紹續先正時惟崇英忠智廉清所至  
風行所居理平山元朱組旣靖蜀京鉞鉞凋戈乃主夏  
盟交修薄衛纂服宏大陟恪左右勤勞翼戴隱微之間  
乃與禍會夷途始半白晝中晦桓楹羽葆久闕鮮原煌  
煌密章肅肅綵言盛德復祉叢滋後昆列郡是式介人  
維濟大江南服考禮修職五曹十聯克嗣先德董是經  
費陳之藝極本於教忠懋此宣力伊昔祭器實銘蒸爨  
禮則有變魂遊在茲連崗陂陀宰樹參差悠悠終古永  
揚斯碑

權載之文集卷第十七

唐德德與字載之

碑銘

唐尚書度支郎中贈尚書左僕射正平節公裴

公神道碑銘

并序

王者奉三無私以勞天下則崇德報功加恩飾終與覆  
載照臨相爲用一也惟正平節公以愷悌文敏爲二千  
石尚書郎人浮於食位不配德纂積厚之緒業貽克家  
之燕翼流光裕蠱爲代師式乃元和五年夏五月  
追命告第爲尚書左僕射孝本平忠榮生平哀用摠罔

極以刻金石云公諱倩字客卿河東聞喜人其先嬴秦同姓因封受氏魏晉已還號爲多才八賢方駕百族歸重自魏冀州刺史徽五代至中軍將軍雙虎中軍五代至隨左光祿大夫皇朝贈原州都督忠公仁基忠公生皇銀青光祿大夫禮部尙書定襄金牙兩道節度行軍大惣管贈太尉聞喜憲公行儉公之曾祖也憲公生皇光祿大夫侍中兼吏部尙書安文館大學士贈太師正平忠獻公光庭公之王父也忠獻公生皇尙書祠部員外郎贈太子賓客禎公之烈考也公天資宏裕虛受通理臧氏之有後於魯管氏之代祀於齊遠至之器發於

岐嶷年十一以相庭推恩授家令寺正滿歲選部銓第  
甲乙補太常寺主簿居先府君喪漿水不入孺慕殆於  
滅性宗門憂其死孝經一作禮文俯就衣服外除歷華陰  
馮翊二郡司戶參軍轉秘書郎俄丁內艱毀瘠如初禮  
違難江介就拜洪州司馬改太子司議郎徵爲殿中丞  
侍御史拜度支駕部二員外遷司勳郎中秘書少監歷  
信饒二州刺史復徵爲度支郎中其佐鍾陵也領留府  
之重居議郎也贊計司之職暨登中臺亞中秘皆兼柱  
下方書之任自淮而南涉江而西荆衡漢沔湘中夏口  
半天下輿壤爲都府者十數公四顧使車連佩數印督



課郡國調其盈虛吏祿兵食之仰給輸將轉漕之回遠  
法錢牢盆之制田租口賦之差權其輕重商其功利察  
下人之疾苦廉長吏之善否車不輟軌有勞於時其始  
受命也寇劇橫厲三川如燬陰方出師募義助順代宗  
焦勞念慮命德宗以雍州總戎賦輿所曾征繕不給有  
詔輟東方軍市之租移用于中都屬受鉞之臣矜功觝  
望師老專利便方自營公慨然牒書譏切備至向之廢  
格悉用平鐫義夫以之感激王族以之震耀其理信州  
也用寬惠誠厚輯乘所部穡事滿野嘉生同穎年以順  
成人斯洽和復其庸亡五千室闢其農耕二萬畝交代

之日不書於籍且曰吾以恤隱豈當沽美不伐之善欲  
蓋而彰方帥表理行第一增秩至正議大夫加金印紫  
綬其爲饒州屬所代者非其人因緣權幸貪猾無  
狀公以廉平頒詔條以慘怛撫痍傷四封愛戴如熱斯  
濯其後徵拜也朝廷誅內臣修百度彌綸經費委重有  
司公以郎吏代故相第五琦專判度支事方冀裁成九  
賦超贊六職以美利利斯人人望日大天胡不惠以大  
厯七年秋七月考終命于長安光德里第春秋若干以  
某年月日歸全于萬年縣神禾原之大墓禮官博士以  
公處難不謀其身牧人不私其功能固所守以行制度

易嘉名以旋行禮也惟公直而溫簡而文才裕於物器  
周於用靜若蒼龜動如千鎔秉是貞厲終焉節適著文  
集十卷溢城集五卷比興屬和聲律鏗然引拔參佐皆  
一時名士風采賢材邁絕羣倫齒位未極爲薦紳所痛  
夫人京兆韋氏扶風太守恒之女以太宗之冢婦諸侯  
之內子衿聲承訓籩豆助祭當室以敬睦親以仁姿操  
卓淑音徽宏太盛德著乎母儀惠心通於佛乘五蘊不  
入六姻是憲始封咸寧郡君後三追錫至邠國太夫人  
有子曰均以御史大夫工部尙書尹正荆門節制上游  
就加吏部尙書尙書右僕射元和三年抗章入覲真拜

右僕射判度支加秩金紫光祿大夫由河東郡公進封  
郇國歲中進左僕射同中書門下平章事撫征漢南臨  
長諸侯惟郇公直清宏重有文武貞幹得時大行爲王  
室輔慮善以動官修其方賦政以惠南國宣威以靖西  
蜀師長百工阜成中邦兵符相印焜耀章灼樹尊程能  
之績勤身體遠之用居則有猷動則有功率循風訓以  
履尊大君子曰憲公忠獻公之休烈丕矩再世盛德屈  
於即位必復之慶其在是乎初郇公之受律也孝文追  
贈公絳州刺史其進律也順宗贈公禮部尙書今皇帝  
永懷義方於是有左揆之命公之績慶郇公之孝思可

謂至矣郇公以三代論譔皆上台雄文猥以通舊忘其卑鄙辭則不腆庶傳信之無愧焉銘曰

河汾之東慶祉所鍾公相歲耄德輝昭融矯矯節公體仁循性乃貽後昆實稟先正大尉經武大師翼聖施于儲賓執德之柄公用循良惠于三邦公有德澤宣于四方急病尙仁履險乘剛化被煩苦斯焉樂康吉祿方摯壽堂以闕謫此家聲揚于令嗣恩崇鼎鉉績茂師帥中外服勞安危注意使蕃屬任宏大名器孝理是尊義方所自九原之中禮盛服充王三錫命襚飾宗工連崗崢嶸介原穹崇陵谷有變令聲無窮

唐中散大夫殿中侍御史潤州司馬贈吏部尚

書沛國公武公神道碑銘

并序

種德考祥賢人積厚之業尊仁安義君子揚名之孝其敬養也諭之於道其貽慶也教之以忠宏保父於元臣集寵靈於追命見之於尚書武公矣公諱就字廣成沛國人周室之興本於忠厚趙王之裔厥有勲賢元魏步兵尚書鴈門朔方雲中馬邑四郡太守始啟封晉陽田祿蓋大生國子祭酒受陽公神龜受陽四葉至太原王諱華太原生鄼國節公諱士逸節公生河間郡王諱仁範河間生潁川武烈王諱載德代以文武上才爲將軍

二千石識芒碭之氣密贊皇圖承沙麓之祥分封戚里  
潁川生考功員外郎修文殿學士諱甄字平一以字行  
於時未弱冠有重名閱覽博古爲人文龜玉在天后朝  
累徵不起以公族好爵爲懼常晦其明與桑門大士修  
無生法中宗復辟用踐周行載筆論思侍盛淵雲之選  
賦詩感激必以呂霍爲誠雖位有陟降而道無磷緇叢  
滋後昆纂服遺烈公卽考功府君第三子也肅而寬簡  
而廉忠方抗直純厚彊固博洽文誼周通憲法始以方  
聞之士對詔策佐官衛李梁公峴之守右扶風也表爲  
兵曹掾宣皇在岐供侍有勞改永樂令厯河中府戶曹

轂下求吏轉萬年永建陵復土推擇充奉拜醴泉令朝  
廷嘉其才擢爲殿中侍御史修起矩度堅明不回時戎  
車方駕泉貨力屈皇華載馳董荆衡漢沔之賦以嚴見  
憚爲吏議所侵貶郴縣尉移句容丞二地有南嶽三茅  
靈僊遺趾於是浩然自得與道爲徒方解纓絡以暢天  
理且曰窮與通在吾靈龜耳外物其如予何其道觀察  
使挹其風聲薦授秘書郎潤州團練副使入爲京兆法  
曹加中散大夫忽忽不樂求爲潤州司馬滿歲徙家嵩  
洛愈尙夷曠中朝名卿大夫四方賢侯通人多與公爲  
道義之交賈太傅魏公用清靜理東郡以益公待公亦



既戾止俄然化往時貞元六年冬十一月享年八十理  
命終止視道門儀法以明月之晦降體魄于邛山北原  
有靈鶴百數徊翔嘹唳其休徵歟其元契歟惟公文學  
政事泣官十二次冠神羊駕四牡剛腸正詞臨事風生  
君子之方有邇有合或忌公之直或愛公之才行藏牽  
平時而道不屈得喪宜乎已而神益王與張禮部謂元  
容州結歌詩唱和著文集五卷自有塗中之適異乎澤  
畔之詞前夫人隴西李氏生長子譚而歿譚爲金壇令  
士行清修官屈其志繼夫人汝南縣君周氏中書舍人  
思鈞之孫單父令瑛之女專柔淑慎以正家道有子曰

元衡文行宏懿靜深周密遵道而行有儀可象代天工  
以和帝載賦明命以贊皇極元和二年春正月由戶部  
侍郎同中書門下平章事秋八月兼領戶部侍郎事冬  
十月又以門下侍郎檢校吏部尙書成都尹劔南西川  
節度觀察西川八國瀘南安撫等使自文水縣男再徙  
封至臨淮郡公上以井絡之下新去湯火亦旣震耀是  
圖生殖輟台宰之重爲慈惠之師黃樞金鉉鉞鉞鉅鬯  
旬歲間三錫命恒赫嘉會綢繆樞極信向禮賜冠于羣  
倫豈非公之道阨而不伸而昌大於後抑義方家法固  
有類乎公捐館四年而夫人歿其明年臨淮公乃舉公

之窆與夫人之喪改葬緱氏潁川王之兆從先封以叙昭穆禮也初臨淮王至監察御史而孤其後再爲中執法朝典覃恩贈公杭州刺史其司大政也再贈公吏部尙書夫人始追封文水縣太君益封汝陰郡夫人顧復罔極之報哀榮歸厚之禮成於德器名教稱之臨淮公考功府君之謫掾于吳也與德輿王考府君有儔札之契油素斯在清徽未泯德輿獲與相君交代爲地官小司徒陪外廷之末議承宰府之寬政有命論譔忘其菲薄刻茲樂石以表鮮原銘曰

君子之道剛方絜矩或消或長或默或語於惟尙書執

憲天朝密侍殿內肅清羣寮鋒芒肯綮湖海飄飄以恬  
養智毋落吾事涓合虛元脫遺聲利題劍告第寵靈斯  
備元袞介圭流光所自煌煌台宰天下是毗廕庥岷峨  
灑濯癘疵顧此忠力無非孝思緱原峻厚兮幽宅悠久  
崔巍介石兮天矯螭首鏤嘉聞兮示厥後

唐故光祿大夫檢校尚書右僕射兼右衛將軍

南充郡王贈太子少保伊公神道碑銘

并序

昔伊尹相湯伊陟相太戊咸有一德格于上帝其

籍以敏辯仕蜀爲將軍伊馥以勇力佐魏爲司空曠遼  
綿代復續休緒者曰南充郡王諱慎字寡悔剛毅勇悍

鷹場鷄立勞勤四朝終始一心涉覽春秋戰國策太史  
天官五行之書用善射中鵠補廣州綏南府折衝都尉  
丁夫人憂以毀瘠聞初公之孤也幼不知先子之殯將  
祔二尊日號于天魂交神還盼蠶誠感壤而樹之率禮  
無違大厯中嶺南裨將哥舒晃盜殺其帥呂嵩賁以亂  
竊據府中南方蕭然江西連帥路嗣恭承詔出師命將  
孟瑤暨公以討公以水陸士徒分道鼓行晃之謀主蘇  
渙騎將王明悅鴟張蟻聚皆據阨害公曰寇不可翫勝  
無幸焉毒之酒腊盡在是矣疾力交梓必亟吾中  
乃春其喉而潰其腹斬首三千級下韶州其明年戰于

把江口水道湍悍戈船趲趲公浮筏寘薪迎風縱焰寇  
之燋没于水火者終夕有聲又明年軍于滑口于端州  
于潮陽次于廣州冬十月斬晃湏于泔溪揭其首以徇  
幕府上功拜連州長史換撫虔江三州別駕建中初德  
宗訓齊万方端正百度以梁崇義負阻江漢未嘗會朝  
詔東諸侯分道問罪公實領江西偏師而統于希烈希  
烈以牒書署公漢南漢北兵馬使公明智牢讓獨率所  
部兵大破翟暉於蠻水俘徒三萬以至于斬崇義平江  
漢厥功居多希烈愛公愈深公懼之愈切一旦決與數  
騎遁歸旣而希烈以急變聞且賂公以堅甲善馬爲之

反間密詔嗣曹王卽訊因俾論公如法公方握兵符在  
境上微聞有命歛手就召曹王挹公名義偉公姿材取  
酒爲壽交歡感泣手疏上列辯其冤誣委之先偏激以  
自效乃畧黃梅次長平遇劇賊韓霜露引滿中股斃於  
萬衆之前其徒相蹂蹈死者十七八拔蔡州取蘄州降  
山寇李良領蘄州刺史剖符爲王加御史中丞興元巡  
狩之歲使臣底貢次于蘄口時希烈已屠陷大梁遣其  
腹心杜少誠引勁兵絕江流公以行師七千列樹三柵  
破之於黃崗少誠遁走斬驍一作騎將許少華封其尸爲  
萬人冢進圍安州希烈遣其甥劉介靈二唐書作虛來援擊

于應山生得介靈與郭嵩李廷玉降七千人收戶一萬  
四千人夫婦男女耕桑安堵乃督安州加御史大夫真  
食百室二年五月引兵攻隨走康叔夜於厲鄉獲馬牛  
輜重以益軍實表僞署刺史李惠登爲之刺史終以理  
行閭十二年用久次就加右散騎常侍後三歲天子以  
公積功勞使中貴人持命書金印卽本郡授公節度觀  
察使且裂齊安爲支郡尋詔公兼統荆洪潭三道支兵  
討叛於蔡敗之於三州港營于義陽戰于申斬級千數  
有詔班師就加刑部尙書進右僕射今天子嗣位拜章  
入覲真授右僕射俄檢校左僕射兼右金吾衛大將軍



坐細故退爲右衛將軍明年復檢校右僕射兼右衛上將軍元和六年十二月晦寢疾薨于光福里不及懸車者二歲追錫太子太保同盟諸侯皆使其命介來弔祠視喪事明年夏五月庚申葬于萬年縣某原鹵簿騎吹如彝禮初公之會王父皇太子通事舍人澄生左衛長史悅悅生贈太子太保衡公之祖禰也積善餘裕追崇以大惟公以武毅通文理視席楷隸心師自得感槩出倫談事如雲起南方裨校屢陷軍陣勢若猛鷲不辭劇易急病而益裕其才履危而不昧於邪悃悃忠直爲中興名將以至於授英蕩題龍泉有功烈勲勞於天下脫

劔薦紳從容漢廷徵循師長文武三品啟體歸全追榮  
官師豈徒然哉公之息男十六人其冢嗣曰宥左領軍  
衛將軍押右神策軍牙門之職能率義訓以揚家聲初  
公來朝也詔宥以侍御史領安州刺史由二千石入筦  
南北軍教忠移孝情禮盡在宥以鄙夫與太保同居里  
閭且以理命遺緘辱徵斯文表諸神道不敢誣也銘曰  
在殷保衡負鼎而相惟唐南充推轂爲將泔溪之刑嶺  
表乃平蠻水之捷漢南以清蔡克滔天曹邸鼓行公率  
武旅迅如風霆斬春安陸連下劇地專城建牙宏大名  
器交修威懷較著功利介圭會朝脫躔師帥南宮端右

武侯縹綺沐浴休明保完富貴歲降婁兮月大呂一氣  
散兮無處所繫甲車兮馬鬣封九原夕兮閔音容揭此  
介石厥聲無窮

唐故江南西道都團練觀察處置等使中散大

夫使持節都督洪州諸軍事守洪州刺史兼  
御史中丞騎都尉賜紫金魚袋贈左散騎常

侍崔公神道碑銘

并序

博陵崔公諱某字某仕至御史中丞洪州刺史江西都  
團練觀察使元和七年冬十一月某甲子啟手足於郡  
舍享年五十五皇帝不視朝褫以左散騎常侍印綬命

郎吏吊祠明年十一月耐窆于東都河清縣先正之大  
墓又明年其孤仲謨纂其代德家法命書愍冊請刻石  
繫辭且自本曰炎帝之後秦夏里黃公廓漢東萊侯伯  
基東漢長岑長駟濟北相瑗晉左僕射洪之代也洪七  
葉至北齊禮部尙書文恭公聖念聖念四葉至君曾祖  
知晦應銷聲舉授兗州金鄉丞王父瑜朝議大夫忠王  
府諮議贈太子賓客烈考灌再爲澧州潭州刺史以御  
史中丞領湖南觀察使當宣武之際用愷悌修政爲代  
吏賜優詔錫今爵推理行第一神道繆鑿遭罹戕害他  
日以君之勤贈太子少師君慈和修潔平粹文敏以勤

身之功善揚積厚之風類始以門蔭調河中府叅軍歷  
邑丞廷史從事察視凡南臺外三爲殿中侍御史嘗以  
公事貶台州司馬聯帥表於理下旋以上介入拜侍御  
史遷考功員外郎度支吏部二郎中商常二州刺史以  
至按部撫封爲太子守臣所居可紀漸漬光大其爲郎  
中考課經費彌綸綜覈三劇曹無留事瀕江郡國仍歲  
天癘而澍河之東南旱特甚縣官恤然臨遣使臣發吳  
之公聚賑越之糴食君受命載馳仁聲先翔噢咻憐怛  
布施優裕不樂宴私不嘗酒肴東人鼓舞感動肝膈其  
爲常州漕引河渠通申夏二濇以宣利澤郡有聽斷之

下有如神明及處方任爲仁由已凡封逋負數千萬夫  
家病焉君曰不曠然大貨無以休息悉用條上盡蒙可  
報然後均列城之田賦去都府之煩弊吏措手足事無  
尤違仁矣哉詩稱仲山甫柔嘉維則申伯柔惠且直惟  
君亦柔而立溫良而能斷教順導利外寬內明函達于  
雅故勤施于政事稽洪範三德其甫申之柔乎凡厯柱  
下史東曹郎皆居代官列郡二千石方帥執法皆循風  
訓江湖之間壤地相錯蒙君父子仍代之澤豈天意之  
裕斯人耶鄙夫久貳六官與君周旋甚熟頃忝宰府詳  
知報政迨茲君守而仲轡儼然焉衰疾不文直詞傳信

銘曰

矯矯少師涖湖之南播遺懿兮抑抑常侍在江之西施  
美利兮乃代元侯寬明輯柔政樂易兮此物此志四封  
茂遂古循吏兮宜永介福奄然厥復左貂襜兮河清鮮  
原羽葆翻翻潛智氣兮有涯必盡流此淑聞斯可貴兮  
刻飾豐碑崔嵬龜螭永爲識兮

唐故尚書工部員外郎贈禮部尚書王公神道

碑銘

并序

今皇帝始初清明永貞紀號追命故工部員外郎王公  
爲華州刺史改元元和之明年再命爲禮部尚書裕盛

之風訓漏泉之慶澤父所以教忠於子臣所以移孝於  
君人道之極盡於是矣公諱端字某太原人曾祖景肅  
皇澧州刺史祖威德州司馬父思獻襄州襄陽縣令公  
方嚴有志尙沉粹潔清不流於俗舉進士宏詞連中甲  
科授崇文館校書郎累遷監察御史工部員外郎其於  
奉朝請之外或介隴坻或留洛邑以疾乞告遇安祿山  
反書聞南游江湖自適其適乾元己亥奄至大病噉夫  
自開元天寶間萬戶祗平仕進者以文講業無他蹊隧  
薦紳之倫望三臺如登青天公與河南元德秀天水閻  
伯璵同歲中正鵠其後冠惠文趨建禮憲章奏議與名



聲俱當時士君子猶以未充量爲嘆其文峻清不滑於  
波流者還一齊記惠上人碣銘微妙虛空深入無際嘗  
與故太師顏魯公暨柳郎中芳陸員外據殷永寧寅爲  
莫逆之交陸嘗言王之莊柳之辨殷之介皆希代鴻寶  
知言者以爲寶錄有子三人長曰綽入道精修爲桑門  
上士次曰紆以文行篤實厯右補闕起居郎右司員外  
郎庫部郎中又次曰紹本名犯皇帝諱而更焉忠厚宏  
裕爲德宗所器厯任戶部侍郎戶部兵部二尙書咨俞  
關決過於宰府大政密議須其一言持平以有守樹善  
而不伐天下之人謂之長者睿聖繼明以檢校吏部尙

書爲東都留守東都畿內防禦使以檢校右僕射爲徐州刺史武寧軍節度使元和七年入覲復爲兵部尙書俄拜戶部事四征六職烜赫尊大故公再有追錫之命夫人亦累贈隴西郡太夫人龍泉魚軒賁飾于冥冥之下名教德器有哀有榮孝理之感人深矣初公之捐館也行次信州瘞於玉山前此夫人歿于洛師窆于潁陽僕射竭其誠信日月有時矣不幸薨落理命其三子嗣事焉由是僕射之孫曰門下省典儀元泰試大理評事攝監察御史元質右威衛倉曹參軍元弼等窮毒在疚護王父母之輅車間關跋履泣問著蔡以八月某甲子

附于萬年縣鳳棲原克纂先志禮無違者而又哀請父  
黨篆茲祖德永揭神道用愧蕪辭銘曰

懿懿王君黃中有文清時發身舒翼卿雲執憲平明含  
香馥粉慶靈下鍾復大其門追錫儀曹徽章顯尊鳳棲  
古原龜策不謬泣祔雙魂禮成孝孫刻銘斯碑君子之  
墳

權載之文集卷第十七

權載之文集卷第十八

唐權德輿字載之

碑銘

唐故朝議郎使持節温州諸軍事守温州刺史

充靜海軍使賜緋魚袋河東裴府君神道碑

銘并序

春秋時賢卿大夫皆叙其代功舊德章明以績一作績蓋

黃流玉瓚之寶產於深山清廟夏屋之材秀於中林其  
或爲珩爲佩爲節爲杙無非禮神用修崇構洪河之東  
裴氏在焉自魏晉迄今忠賢輩出土林以爲領袖史臣

疲于簡策而又奕代降休且公且侯上嬪王姬出領方

州者可得而言以刻金石曰君諱某一作希字某四代祖

懷節皇給事中工部侍郎荆揚二大都督府長史洛州

刺史謚曰定曾祖昭厯司門度支二郎中衛尉太府二

寺卿祖礪厯左右衛左右金吾衛四大將軍太府卿太

子詹事平陽郡開國公謚曰貞自定公至貞公皆銀青

光祿大夫以至烈考忤仕至麟一作卿州刺史太子僕贈

絳州刺史凡四代貴仕左曹二千石四衛九列副冬官

尹東朝禮及易名恩深追遠代修其業鍾美於君君寬

裕博厚恭儉莊誠資性端直詞氣閑雅於經書泛爲疏

達而不窮章句於吏道通於理術而不求聞問自解巾  
至於捐館凡歷十一官無疵政無違德祇守家法奉以  
周旋仕於官朝始爲僕寺進爲洗馬中允再爲家令仕  
於王國歷濟陳蜀三府初爲騎曹掾次爲長史次爲傳  
其初又爲壽安丞後牧臨邛乃遷永嘉班宣六條撫柔  
二郡惠和所被夷越嚮方其在朝也以晁錯之智王陽  
之道而滯於散地恬於久次其剖符也仁恕愛禮而不  
苟簡奉法循理亦不細苛居三年以疾受代貞元六年  
冬十一月沒于鍾陵之私第享年若干明年八月返葬  
于長安少陵原之舊塋以夫人永年郡主祔焉禮也惟

郡主元宗之孫今皇帝之從祖姑也儲是慶靈生而洵  
淑竊窈德象婉婉聽從備柔嘉之行成肅雍之道初天  
寶十三年詔選資地才令以府君有安仁武子之美而  
下嫁焉齋莊以主中饋和樂以宜姻族作配君子禮同  
家人嚴祭祀服澣濯者三十六年而歿春秋五十八歲  
貞元五年也鍾陵之守臣以聞上不視朝率禮有加嗚  
呼以公之率履永年之仁淑宜其蕃祉老壽子孫繩繩  
而生不極其道歿無主其後此伯道之痛碩人之詩所  
由作也遺命以兄之子某爲嗣乃列其祖代官伐請刻  
豐碑辭之不獲乃繫辭曰

河東右族蕃衍紹續代功世祿昌而熾兮乃生永嘉剖符承家實而不華諭於義兮二邦靜謐禮之善物朱幡赤弗亦爲貴兮有齋永年作儷仁賢佩玉鏘然四德備兮天漢之尊平王之孫爛其盈門恭祀事兮返彼元壤少陵之上終古悽愴金石識兮

唐故成德軍節度營田副使正議大夫趙州別駕贈壽州都督河間尹府君神道碑銘

并序

詩之小雅曰尹氏太師秉國之均大雅曰王命尹氏戎我師旅然則代爲天子三公大夫參掌文武故吉甫有作憲之美翁歸爲兼備之才周漢以還似續忠厚今義



武軍節度使相國延德郡王司徒公之從事曰澄從公  
來朝朝有賞典式寵戎輅當簪法冠永懷罔極之恩願  
迴追錫之命司徒嘉焉以其詞列上先皇帝孝理天下  
愀然曰俞繇是輟功次之遷遂飾終之澤迺三月丁酉  
有詔贈澄之先人正議大夫趙州別駕鉞爲壽州都督  
先夫人吳郡陸氏爲吳郡太夫人印綬璜珎光耀幽窆  
哀榮所被名教多之澄又稽甲令繹家謀以漏泉告第  
之恩有螭首龜趺之制於是傳詩而系辭云都督以諱  
爲字天姿剛健經術百氏陰符六韜皆所講習通其旨  
與天寶初舉進士不第幕府上功盧龍府別將稍遷瀛

州高陽縣令歷恒州司法參軍梟城令寶應初以太子  
中允兼恒州長史錫金印紫綬廣德中遷易趙二州別  
駕節將推其才表爲營田副使理二縣佐三郡勞徠安  
集周爰圖慮以饑饉之歲丁師旅之殷敷其慈和得以  
安靜議者以魯仲堪龐士元方之旣重大田實居上介  
俗知禮節師以阜饒方陟勞課奄然大病以大厯七年  
秋七月啟手足于恒州靈符里享年六十一以明年夏  
五月窆于藁城縣東子樂原夫人嵐州刺史道之孫密  
雲令昌嗣之女能以仁順洽于宗姻晝哭旣除喪十四  
歲以貞元四年冬十月歿于道州以十一年冬十二月

祔焉從魯禮也有子三人長曰渾唐縣尉次曰濤趙州  
司功參軍皆不幸短命澄卽其幼子也尙學理文敏信  
誠厚雅有惓惓不隨波流山東士大夫多稱其名義由  
北平尉爲定州功曹掾辟司徒府主其謀猷每懷戎章  
驅疾傳陳賦興之事明利害之鄉叶于中權皆有功效  
洎元侯入覲天子錄功賓僚傳校命賜優重而澄永懷  
霜露願貴邱封感于宸衷盛此徽數君子曰是舉也有  
以見尹氏之孝思都督之流慶上公之與善元首之加  
恩以風四方以厚士教雖澄之未貴仕其所以宏助者  
多矣初都督之禍曰本古仕至常州武進尉武進之父

曰正義歷許相宋三州刺史司農少卿司農之父曰夏  
終滄州司馬司馬之父曰文哲仕隋青泗曹漢陝宋洛  
相等州刺史本郡太守大理卿戶部尚書皆有德善揚  
于官業蓋二雅遺烈之所從來遠矣德輿門人蘭陵蕭  
籍與澄爲寮同在公府狀其往行兼列命書忝貳邦教  
敢忘聳善乃爲銘曰

尹氏代律聿修文武自周綿漢炳耀圭組懿懿都督遠  
承丕矩方騁夷途俄歸野土慶延嗣續職佐藩垣遠從  
上台來朝天門追飾二尊輝榮九原密印畫綬隼旗魚  
軒官纔掾吏跡重知已恩迴大君澤及先子以盡忠養

以宏孝理揭立貞珉芳馨在此

唐故右神策護軍中尉右街功德使開府儀同

三司守右武衛大將軍知內侍省事上柱國

樂安縣開國公內侍省少監致仕贈揚州大

都督府孫公神道碑銘

并序

元和元年冬十月內省少監致仕孫公寢疾薨于京師  
廣化里私第享年若干十有一月有詔追贈揚州大都  
督法賻布絹各以百數明年十一月葬于涇陽縣之某  
原命婦諸孤家老故吏以服勞詔祿恩華慶賞之不可  
以不識也請鑲豐碑揭于鮮原云唯聖唐仁澤汪濊威

靈燁耀乃法辰象以嚴武師惟肅宗創新軍于北落克  
靖患難惟德宗置中護于內朝而爲總制翊震嚴以宣  
七德正師律以張四維勤勞警巡東拔忠厚不失於正  
克保其終者惟公有焉公諱榮義字某其先吳郡人也  
軒裳延耀本冠邦鄉版籍推遷□來京轍今爲京兆涇  
陽人曾祖翼皇右金吾衛中候祖庭玉贈兗州刺史父  
知吉皇開府儀同三司行右領軍衛大將軍知內侍省  
事上柱國魏國公或徵循筮仕道在安卑或麾節加恩  
義彰追遠以至于先公貴位名重前朝宏內省之事任  
受父封之徽命承休襲慶終踐代官裕盛教思備遵家

法公端良謹重潔白詳明事無尤違心必誠信至德中  
策勲至上柱國起家掖庭局監轉掖庭局丞宮闈局令  
再爲內謁者局叙品至朝議大夫恩錫章服又加中散  
大夫貞元十七年充右神策軍護軍中尉判官纔浹辰  
遷內常侍充副使越翌日兼右衛功德副使十九年拜  
右驍衛將軍充右神策軍護軍中尉右衛功德使明年  
有詔知內侍省事歲中加特進右武衛大將軍封樂安  
縣開國男德宗弃天下順宗諒闇整訓爪牙勤宣翼戴  
進驃騎大將軍益封樂安縣公食邑一千五百戶今皇  
帝踐祚以年疾加侵固辭戎政重違誠懇恩禮舊勞拜

開府儀同三司既積沉恙累章誠乞乃下優詔遂其致  
政之請焉初公以大厯中奉使交廣裔夷膏禍有梁氏  
尋氏聚爲寇數公與守臣決策潛師盡殪南服以清厥  
猷茂焉建中中將軍許庭遊將命北蕃公爲之介屬張  
光晟虎斃其衆與陰方爲仇野心煩言將逞憾以報才  
全智免終靡盬而歸俄而希烈干紀淮瀆不靖受中省  
合兵符取桂嶺湘川之衆益漢陽夏口之鎮以當劇賊  
且護成師收應山援安陸凡鄂之成績公有助焉尋又  
監慶州行營兵馬皆奮策盡用寧邊鄙暨大討循爪士  
衆贊禁營乃昇副車超踐中尉講軍志循武經比詩人



圻父之職得易象貞師之義承睿謀以決勝援羣師以  
懋功肅肅然安人而禁暴雄雄然由中以制外積勞不  
伐受寵若驚恩波深而守以慎懼爵祿厚而不盟侈汰  
其或方國問遺歲時交換公曰有齒以焚古人所誠無  
脛而至廉士不居外不異於人中不易其操泛然虛受  
悉助軍實強力匪懈推誠在公或籍在行間而法千吏  
理苟簡書所至必械繫送之心無私焉直而後已當親  
重之任護腹心之臣入近天子之光出列諸侯之上豈  
徒然哉先魏公信嚮釋氏薰修心法嘗於邑里奏建寶  
應衆善寺五代之壤樹依焉至公又請於寺內置無垢

淨光法華三院塔額檀施賦獲爲淨人者十輩所以修  
先志所以崇佛乘孝子信士斯爲至矣昔漢室以濯嬰  
爲謁者隨何爲護軍正伯參珥貂之制環列據銜殊之  
重驃騎儀同品皆第一護封益食事軼常均及屏去燠  
灼翛然恬曠家居得謝以至沒身其動也本兵柄而不  
可犯其靜也冥道樞而無所累納忠循理議者嘉之前  
夫人郭氏驃騎大將軍贈開府儀同三司全羽之女克  
恭婦道不幸先歿今夫人東平郡君呂氏柔嘉有儀晝  
哭遵禮奉終誠信以前夫人耐焉長子某次子某官某  
等棘心雪泣銜恤無怙越承軒禁嗣續忠勞公之兄前

保壽寺上座內供奉監義大德道系捨筏之宗已超學  
地在原之痛猶切孔懷公之弟某官某等同氣聯華致  
美有裕忍哀襄事先遠是圖龜兆告猷芻靈啟路卜佳  
城於此室體魄焉依轉樂石於他山聲塵斯在銘曰

大君御極修理百職抑抑樂安逢時竭力超侍軒墀抱  
公絕私乃將命令以會師期保合誠信周旋險易韜鈴  
講貫印紱歲蕤帝座之西星文昭晰鉤陳之北武旅森  
列爲之總制所以關決凡在拊循士皆感悅委重三朝  
成功九霄退身崇讓息偃迢迢逝川閱水截道驚馳恩  
崇懣蓋吹咽笳簫涇流湯湯谷水池陽舊邱崇岡若弁

若堂宰樹如雲仁祠在旁刻銘于茲兮永永不忘

唐故義武軍節度度支營田易定等州觀察處  
置等使檢校司空同中書門下平章事贈太  
傅上谷郡王張公夫人鄧國夫人谷氏神道

碑銘 并序

皇帝以文明御方夏以德禮序人倫貞元十一年秋九月詔侍臣德輿以故義武節度檢校司空同中書門下平章事贈太傅上谷郡王張孝忠夫人谷氏之淑行內則碑刻金石臣聞風有采蘋采蘋易曰中饋貞吉所以表柔明於內子昭節信於元侯宣力獻功抑有其助夫

人之先魏郡昌樂縣人也在漢元成之代衛司馬吉以  
勲勞致命於絕域大司農承以文學盡規於本朝前史  
書之以勵臣節四代祖邪律皇朝諫議大夫宏文館學  
士正直之道播於清時曾祖輔哀左羽林軍長史祖倚  
相秘書省正字仍代藏器晦而不輝考崇義天寶末有  
行師北鄙之勞累書勲伐至左金吾衛大將軍兼殿中  
監贈特進夫人卽特進府君之第八女也稟是明封鍾  
于女士淑閑之度中外宜之初太傅始自軍校建功河  
朔克彰婦順敬贊宗事正位于內尚柔有儀洎太傅自  
易部領常山遂分節施以至相公上畧兼資於明智中

盡載揚其惠和二姓有輝六姻是 盡瑜翟之飾動珩  
璜之聲建中元年封魏郡夫人三年進封鄧國夫人旌  
淑哲也鵲巢之均一家人之悔屬籩豆敬齋之色琴瑟  
靜好之饒夫人備有焉惟堂晝哭良弓繼志上慈下厚  
就養無方此又令嗣之能致其敬也貞元十一年冬以  
門承勲績之崇恩有選尚之貴方築外館聿來上京十  
二年二月丁卯以疾終于萬年縣安仁里私第享年四  
十九遺章上陳敬而得禮皇情憫惻恩賻有加嗣子茂  
昭義武軍節度易定等州觀察處置等使起復左金吾  
衛上將軍檢校工部尚書定州刺史兼御史大夫廷德

郡王博陵上谷之師以續休緒戎車委重優詔抑情次  
曰茂宏雅王府司馬茂宣舒王府長史嗣雍杞王府諮  
議參軍嗣慶試將作少監御史中丞幼曰茂宗銀青光  
祿大夫行光祿少卿員外置同正員駙馬都尉皆以純  
孝裕盛居喪執禮以其年冬十月甲戌奉夫人之轎車  
葬于京師少陵原不耐舊封式遵古道恩延戚里有命  
從之初夫人之兄從政實傳戎韜之訓以中執法剖符  
定州有姊四人所天皆貴異姓之社從夫以尊公官之  
教率性而中象服交映魚軒並馳其後婚親無非勲德  
故太尉中書令西平王今大尉中書令瑯琊王皆夫人

之姻也納徵佐餽焜懼一時此又閨門之盛而積善有類也柔正之風本於王化愷悌之澤洽于幽泉此臣所以拜受德音銘諸樂石銘曰

在漢子雲侃然中正昌言獻可遠緒傳慶降及特進策勳斯盛乃生夫人如玉之溫婉彼淑質宜于盛門金鉉石第所從益尊亦旣晝哭道彰訓育中權之貴克繼藩服下嫁之榮方承湯沐生也有涯壽胡不遐奄然冥漠喪此柔嘉遽返黃壤空悲白華秦原隱嶰丹旄徐引此焉幽宅自昔同盡追琢徽音終古不泯

唐故太清宮三洞法師吳先生碑銘

并序



雲出於山遊於天復歸於自然先生之道似焉涵泳乎  
道之樞倘佯乎物之初以生爲蘧廬復返有而入無先  
生諱善經緝雲仙都山人也自曾王父而下皆質誠孝  
敬登聞於鄉黨先生未成童博貫儒書讀道德經至爲  
學日益爲道日損三復恍然曰吾知之矣改習四真靈  
寶等經年十七本郡以制度居緝雲山其後遍登匡廬  
天台三茅句曲泛然不囿於物虛已以遊代乘彼白雲  
至于帝鄉時宰王黃門將爲太清宮使奏隸官籍乃從  
冲虛申先生受三洞經法貞元中於宮院立仙壇躬上  
士勤道之誠宏大君受釐之重陰功幽贊何可勝言德

宗錫以纂節幡珮靡有不備初冲虛之師曰清簡泉君  
泉君之師曰來君來君之師曰萬君皆有遺像在開元  
觀先生乃茲焉宴息立申泉二碑以發天光以極師道  
凡儒元宿學有道仁人貴遊象服男夫女士傳三景真  
錄者五百餘人一旦謂入室弟子曰天行物化吾之晦  
明其動也與物皆春其靜也與化爲一成形待盡吾何  
爲哉乃於畢原近郊修露仙隱景之地元和甲午冬季  
朔旦齋沐潔清與其徒元言終日越三日焚香朝拜泊  
然返真明年正月寧極於露仙館某年八十三矣其受  
道也有反風晏溫之景其委化也有清香靈鶴之祥斯

又不可涯已嘗以爲無心者與物冥則未嘗有對於天下順性命而遺耳目其在是乎其餘奔走於寒淺倒置之中吾不爲也所注道德經并著文二十篇元覽至頤通乎微妙嗟乎先生之容不可得而見矣先生之言不可得而聞矣但糟粕具在神明不滅采真者得以虛心道門威儀趙常盈偏得先生之學與符洞幽周元德吳元壽董太珣等或關尹受教或庚桑爲役有年數矣吳郡歸冲之廣平劉素芝天水權載之皆從先生遊者也元德狀其崖畧授載之以金石刻噫嘻老龍吉死矣安所發予之狂言哉乃銘曰

萬情弊弊謬繳之內先生懸解遐視區外族系于東吳  
稟靈于仙都演道于明廷棲神于太清隱機于開元歸  
根于露仙其來適然其去寥然大圓清兮大方厚元卿  
返駕兮無何有刻介石兮茲不朽

唐故章敬寺百巖禪師碑銘

并序

禪師長老百巖大師之師曰大寂禪師傳佛語心法始  
自達磨至于惠能之化行于南服流于天下大抵以五  
蘊九識十八界皆空猶鏡之明焉雖萬象畢陳而光性  
無累心之虛也雖三際不住而覺觀湛然得於此者卽  
凡成聖不然則一塵瞥起六入膠固循環回復於死生

之中風濤火輪迷忘不息授受昭合大師得之一言宗  
通深入無礙師諱懷暉姓謝氏東晉流寓今爲泉州人  
孩提委發博究書術一旦慨然曰我之祖先今安在耶  
四支百體視聽動用孰使之然耶漼然雨泣故服緇褐  
志在楞伽行在曹溪得圓明清淨之本去妄想因緣之  
習百八句義照其身心心離文字化無方所於是抵清  
涼下幽都登徂徠入太行所至之邦被蒙法味止於太  
行百巖寺門人因以百巖號焉元和三年有詔徵至京  
師宴坐于彰敬寺每歲召麟德殿講論後以病固辭十  
年十二月恬然示滅其年六十其夏三十五弟子智朗

志操等以明年正月起塔于瀾陵原凡一燈所傳一雨  
所潤入法界者不可勝書著法眼師資傳一編自雞足  
山大迦葉而下至于能秀論次詳實或問心要者答曰  
心本清淨而無境者也非遣境以會心非去垢以取淨  
神妙獨立不與物俱能悟斯者不爲習氣生死蘊之所  
累也故薦紳先生知道入理者多遊焉嘗試言之以中  
庸之自誠而明以盡萬物之性以大易之寂然不動感  
而遂通則方袍褒衣其極致一也嚮使師與孔聖同時  
其顏生閔損之列歟釋尊在代其大惠綱明之倫歟至  
若從師受具之次第宰官大臣之尊信誕生入滅之感

異今皆不書德興三十年前常聞道於太寂聿來京下  
時欵師言頃因哀傷以獲悟入則煩惱不遠菩提雖聚  
散於此生期會歸於彼岸銘曰

西方之教南宗之妙與日並照百歲得之爲代導師頌  
若琉璃結火燔性愛流溺正癡冥奔命卽心卽佛卽色  
卽空師之道一作通今無來無去無縛無解師之化兮揭  
茲靈塔丹素周匝示塵劫兮

權載之文集卷第十八